

1 TESALONAIKA

Faulo yana kiluma nagami me Tesalonaika 'waidie.

Tutuyanina Faulo i miamia Kolinita, de'e leta nagami i kilumi me Tesalonaika tovetumaganavo faifaidi. Tesalonaika tamu 'atamana bwaikina 'awalawa Masidonia nageneye, 'atamananina balebaleye. Faulo yana lau'age-vuvua 'ana vetonu 'waineye, bei be'ama Vala 'Atumaina i lu'ageyeni me Tesalonaika 'waidie. Yana lau'agenina 'wainega, tamu 'aila'a tovetumagana i souyeni. (Folova 17:1-14) Tovetumagananidi 'ifwaidi me Diu, we'e mali tomotoga taunidi kebu Diu sai'afo moso'idi. We'e me Diunidi 'ifwaidi Iesu yana tafalolo 'ana 'eda'eda 'waineye i damana, begaidi me Diu to'edakumetavo i ve'unumagigi, Faulo ma enavo i sogiedi i nagoi Belia. Mulieta Faulo Timoti i vetunei i nago Tesalonaika. Tutuyanina i vilai i mai valadi 'atumaina i lu'ivoneyeni.

Letanina nageneye Faulo i vekaiwa Yaubada 'waineye fai me Tesalonaika ma yadi vetumagana i tokemaiga vita tulina tulina 'waidie, wata fai ma yadi nuakalikali Faulo i nuanuani. Faulo nuanuana yana leta 'wainega i na kiavefa'alidi wata yadi velutoli tovetumagana i wafaga faifaidi i tutuli. De'e letanina 'ana 'idi side bani'odi.

Faulo yana vona-vekaiwa. 1:1

I vekaiwa Yaubada 'waineye yadi vetumagana faifaina. 1:2-10

Faulo yana sauluva me Tesalonaika
 'awasasadie faifaina. 2:1-12
 Faulo i nuanua me Tesalonaika yadi mia
 faifaina. 2:13-3:13
 Sauluvanidi tovetumaganavo 'adi laubwaina.
 4:1-12
 Ve Iesu yana vila-vaitugana faifaina. 4:13-5:11
 Velu'ase'ase 'ifwaidi wata yana 'alanuai. 5:12-
 28

¹ Emavo, yau Faulo, Sailasa wata Timoti taiadi 'a vekaiwa 'waimie. 'Omi Keliso yana 'Aila'a 'wa mi-amiani 'atamana Tesalonaika 'waineye, Yaubada Tamada wata 'ada Toveimea Iesu Keliso yadi to-motoga, 'waimie 'a kilukiluma.

'A vevelu'ui faifaimi, nuanuama Yaubada Tamada wata Keliso ma yadi nuakalikali i na vevesauluva 'atumaina 'waimie wata nuanua bikana i na vevelele mi 'atumaina taiadi.

Vekaiwa me Tesalonaika yadi sauluva faifaina.

² ✧ Tutuya fuedi 'a vevekaiwa Yaubada 'waineye matatabumi faifaimi wata 'a vevelu'ui 'waineye bega i na 'i'ivaisemi. ³ Yama vekaiwa Yaubada Tamada 'waineye faifaimi, fai tutuya fuedi 'a nu-anuani yami vetumagana ma 'ana 'eba 'isa, yami folova toketokena fai ma yami nuakalikali, wata vita 'waidie 'wa totokemaigemi fai yami vetumagana 'wa yato-vagaseni 'ada Toveimea Iesu Keliso 'waineye.

⁴⁻⁵ ✧ Emavo 'a 'asetai Yaubada i nuakalikaliemi wata i venua'ivinemi fai tutuyanina Iesu Valana 'Atumaina 'a viweni 'waimie, 'Anu'anunu 'Atumaina i 'imoso'ieni bega kebu vona 'aisena

'wainega, wata Yaubada yana toketokena i vemi bega 'wa ve'awamogitana. Yama sauluva 'akonadi 'wa 'asetai tutuyanina taiadi ta miamia, yami 'eba 'isa wata 'ami 'aivaita.

⁶ ✧ Yama sauluvanidi wata 'ada Toveimea Iesu yana sauluva 'wa vetutuyamedi Avinodi vita fuedi 'wa veluagadi Keliso 'ana tovedumwe'ai'ai 'waidiega, siwe ma yami sosoana 'Anu'anunu 'Atumaina 'wainega taunimi 'wa tauyemi Vala 'Atumaina 'waineye. ⁷ Keliso 'ana tovetumaganavo 'awalawa Masidonia wata Gulisi nagedie yami sosoana wata yami tokemaiga i 'isedi yadi 'eba 'isa i na vetutuyamemi. ⁸ Vona mogitana 'awalawanidi 'adi tomia Toveimea Valana i 'aseta 'waimiega wata 'awalawa 'ifwaidi 'ani'ieyega 'waidie tomotoga fuedi yami vetumagana Yaubada 'waineye valana 'akonadi i 'aseta, begaidi kebu i da lubwainema 'waidie 'a na lulu'ivona. ⁹ ✧ Tomotoganidi i lulu'ivona basenadi ma yami sosoana 'wa lu'uma'umaiema faifaina, wata kumaea 'waidie 'wa tauyemiga 'akonadi 'wa vedumwe'ai'aiedi 'wa nuavilami taunimi 'wa tauyemi Yaubada 'waineye 'wa vetofolova faifaina. Taunina 'aiseotogina Yaubada, miamia-vagaina. ¹⁰ ✧ Wata tomotoganidi i lulu'ivona 'wa lulukamata Yaubada Natuna yana vilavaitugana abamega faifaina. Natunanina Iesu, kumanina basenadi i sivetovoia wafayega bega i 'i'ita'ita'ieda Yaubada yana nuasako wata yana vematavuloga 'awaie i na souyediga 'waidiega.

✧ **1:6:** 2 Tes 3:9; 1 Fit 5:3; Lom 1:8 ✧ **1:9:** Fol 14:14-15 ✧ **1:10:** Mad 16:27

2

Faulo yana folova Tesalonaika 'waineye.

¹ Emavo, 'akonadi 'wa 'asetai yama wai 'waimie kebu 'a da wai-maimaiga, 'wainega 'aivaita 'wa veluagai. ² ✧ Wata 'wa 'asetai basenadi 'atamana Filifai 'waineye Keliso 'ana tovedumwe'ai'ai vita bwaikina i velema wata i yagaima siwe yada Yaubada toketokena i velema bega 'a wai 'waimie ma yama venuafoufa'ala Valana 'Atumaina 'a lu'ivona. We'e tovedumwe'ai'ai 'ifwaidi taiadi 'wa miamianiga kebu 'a da kololoyedi bega yama folova 'a da baileni fai Yaubada yana 'aivaita 'wainega 'a folofolova. ³ 'A lau'agega 'waimie kebu vekaliga 'alo si'wayo'wayoga we'e mogitana ava'ai Yaubada nuanuana 'a na veifufuyediga faifaidi 'a vona. ⁴ ✧ 'A vonaga fai Yaubada i nuani 'ima i lubwainema bega Iesu Valana 'Atumaina i tauyeni 'waimeye 'a na lulu'ivona. Kebu tomotoga 'adi kiavesosoana faifaina 'a da vonavona siwe ava'ai Yaubada nuanuana 'ana 'eba kiavesosoana faifaina 'a vonavona, Yaubadanina yama nuanua matatabudi i 'asetadi, 'atumaidi 'alo sakoidi. ⁵ ✧ 'Omi 'wa 'asetama wata Yaubada i 'asetama kebu nuami 'a da 'ani'anidi subia-vekavekali 'wainega wata mani faifaina kebu a da veiana-sebesebemi. ⁶ ✧ Kebu 'ama subia faifaina 'a da folofolova, 'omi 'alo mali tomotoga 'waimiega.

⁷ 'Ima Keliso yana tomata'aulelevo 'ama fata 'a da lukakademi 'ani'ani wata nani 'ifwaidi 'wa da velevelema, siwe kebu bani'odi 'a da vevesauluvediga. Tutuyanina taiadi ta miamiani

✧ 2:2: Fol 16:19-24 ✧ 2:4: Gal 1:10 ✧ 2:5: Fol 20:33 ✧ 2:6: Ion 5:41,44

yama sauluva bikana bani'odi vavine natudiavo i 'i'isave'avinidi. ⁸ Ma yama nuakalikali Yaubada yana Vona 'a lu'ivona 'waimie. 'A nuakalikaliemi bwaikina begaidi kebu vona 'aisena 'a da velemi, wata taunima 'a tauyema 'a vetofolova 'waimie.

⁹ ✧Emavo, 'wa na nuani basenadi yama folova 'waimie. 'Aiata wata lovana 'a folofolova bwaikina, Yaubada yana Vona a lulu'ivona 'waimie wata taunima 'a 'i'isave'avinima 'ani'ani 'wainega fai kebu nuanuama vita 'a na velemi 'ama 'isave'avina faifaina.

¹⁰ Side bani'odi, 'omi Keliso 'ana tovetumaganavo, yama sauluva 'wa 'isedi wata Yaubada i 'isedi, bega 'wa 'asetama kebu tamu tutuya 'a da vekaliemi, yama mia matatabuna 'waidie yama sauluva tonovidi wata 'atumaidi. ¹¹ ✧Fai yama 'aivaita 'aitamogana 'aitamogana 'waimie 'wa da vo bani'odi tomogo natunavo i da 'i'isave'avinidi.

¹² ✧Yami vetumagana 'a kiavefa'alidi, nuami 'a 'iveagiagidi wata 'a vevelu'ase'ase mi yami sauluva i na ve'atumai bega Yaubada i na sosoana faifaimi. I lubwainemi yami sauluva 'atumai'avadi fai Yaubada i venua'ivinemi nuanuana yana 'ai'aiwabu magemagetadi i na velemi taiadi 'wa na miamia yana 'Eba Veimea nageneye.

Me Tesalonaika vita i veluagadi Keliso 'ana tove-dumwe'ai'ai 'waidiega.

¹³ ✧'A vevekaiwa Yaubada 'waineye fai tutuyanina Yaubada yana Vona 'a viweni 'wa nogai nuanuami bwaikina, fai 'wa

✧ 2:9: 1 Kol 4:12 ✧ 2:11: 1 Kol 4:14 ✧ 2:12: Fil 1:27 ✧ 2:13: Gal 1:11-12

'asetai vonanina Yaubada yana Vona kebu tomotogaotoga yadi vona, vona mogitana Yaubada 'wainega. Vonanina 'wainega Yaubada i folofolova 'omi tovetumagana nuamie. 14-15 ✨Emavo, tutuyanina 'wa tauyemi Keliso 'waineye vita 'wa veluagadi taunimi yami tomotoga 'waidiega, bani'odi basenadi me İudia 'ifwaidi i vetumagana İesu Keliso 'waineye i luku Yaubada yana 'Aila'a 'waineye, vita i veluagadi taunidi yadi tomotoga me Diu 'waidiega. Tovedumwe'ai'ainidi basenadi Yaubada yana tolu'ivonavo i luvewafadi mulieta Toveimea İesu, wata 'ima i sogiema. Tomotoganidi ma yadi nuasako tomotoga matatabuda i vevegavieda we'e Yaubada kebu i da sosoana faifaidi. 16 ✨Yadi sakona i 'imoso'ieni igodi i tatalaboda kebu nuanuadi 'a na lalau'age mali tomotoga kebu Diu 'waidie bega Yaubada i na 'ita'ita'iedi. Yadi sakonanidi i vevebwaika i maiga nika 'asiau Yaubada yana nuasako i souyeni i na vematavulogidi.

Faulo nuanuana me Tesalonaika i na foge-vaituganidi.

17 Emavo, basenadi 'a 'iawemi kebu maigimi 'a da 'ise'isedi siwe kebu 'a da venuafanimiga. 'A mai kebu tutuya manamanawenaga nuanuama bwaikina 'a da wai 'a da foge-vaituganimi. 18 Vona mogitana 'a vetafewa 'a da wai faifaina, we'e yau Faulo tutuya fueđi a vetafewa-wayoga fai Seitani yama 'eda i sibodai vita tulina tulina 'waidiega. 19 ✨'Awaie 'ada Toveimea İesu i na

✨ 2:14-15: Fol 17:5; Fol 2:23 ✨ 2:16: Lom 1:18 ✨ 2:19: Fil 4:1

vilai i na mai fueda ta na tovoi mataneyē, 'omi yama 'eba sosoana 'ama subia faifaina. Yama folova 'wainega 'wa vetumagana Keliso 'waineyē bega 'a nuani mogitana 'ana tutula 'a na veluagai Yaubada 'wainega. ²⁰ Vona mogitana 'omi 'ama 'eba subia 'a sososoanemi.

3

*Faulo Timoti i vetunēi nuanuana me Tesalon-
aika yadi mia i na 'asetai.*

¹⁻³ ✧ Tutuya manamanawena kebu maigimi 'a da 'ise'isedi wata valami 'a da noganogai begaidi 'a vevenuafouviga faifaimi. 'A nuani yau wata Sailasa 'ama 'ailuga 'a na miamia 'atamana Adeni, we'e Timoti 'a voneni i wai 'waimie. Taunina iada 'ama 'aila'a, ma fuemeyē Yaubada faifaina 'a folofolova Keliso Valana 'Atumaina 'a lalau'agevuvua. 'A vetuneiga i na 'ivaisemi yami vetumagana i na kiavetoketokedi bega tutuyanina vita 'wa na veluagadiga, kebu tamu aitoi 'waimiega Iesu i na baileni i na vilai yana sauluva tuatuaina 'waineyē. 'Omi 'akonadi 'wa 'asetai Yaubada vita i tauyedi i na souyedi 'waideyē. ⁴ ✧ 'Wa 'asetai'ga fai tutuyanina taiadi ta miamiani 'a vona-vagasemi 'a vo, 'Awaie Keliso 'ana tovedumwe'ai'ai i na vegavieda vita ta na veluagadi," ava'ai a voneyeniga 'ana mogitana i sousouyeni 'waimie, 'wa 'isenina nika 'wa nuani. ⁵ ✧ Fai a 'asetai vita 'wa veveluagadi a venuafouviga bwaikina faifaimi, begaidi Timoti a vetunēi i wai 'waimie yami vetumagana i na 'iseni toketokena 'alo i mwea bega i na mai i

✧ **3:1-3:** Fol 17:15; Fol 16:1; 2 Tim 3:12 ✧ **3:4:** Fol 14:22 ✧ **3:5:** Fil 2:16

na lu'ivona 'waikuye. A kololo i na nunago Seitani 'eba sailubu bwaikina i na veleml 'wa na be'u bega basenadi yama folova 'waimie i na 'ivesakoi.

Timoti yana lu'ivona me Tesalonaika faifaidi.

⁶ ✧ Side bani'odi, ma yaku venuafouviga Timoti a vetune i wai taiadi 'wa miamia, tutuyanina i vilai i mai valami i lu'ivoneyeni a sosoana fai i vo, Me Tesalonaika yadi sauluva a 'iseni, i vevetumagana mogitana Keliso 'waineye wata taunidi tonuakalikali. Tutuya fuedi ma yadi sosoana i nuanu-anida nuanuadi bwaikina ta na foge-vaituganidi, bani'odi i nuanuayediga 'ida wata yada nuanua i vesala.”

⁷ Emavo, 'ima vita wata veviga 'a veveluagadi siwe valami 'a nogai, mogitana i kiavesosoanima.

⁸ Yami vetumagananina valana faifaina nuafouma i vatu wata yama mia i ve'atumai fai 'wa tovtovoi fa'alina wata 'wa vevesauluva 'atumaina 'Auvea yana nuanua bani'odi. ⁹ 'Asiau 'ama fata 'a na vekaiwa Yaubada 'waineye faifaimi. 'A sosoanemi bwaikina begaidi Yaubada mataneye 'a vevekaiwa. ¹⁰ 'Aiata wata lovana 'a vevelu'ui nuanuama bwaikina tauniotogimi 'a na 'isemi bega yami vetumagana Keliso 'waineye 'a na 'imoso'iedi.

¹¹ A vevelu'ui nuanuaku yada Yaubada Tamada tauniotogina wata 'ada Toveimea Iesu yama 'eda i na 'idewai 'a na wai 'waimie. ¹² Wata nuanuaku i na 'ivaisemi yami nuakalikali emiavo wata tomotoga 'ifwaidi faifaidi i na vebwaika-'afo'afo, yama nuakalikali 'waimie 'ana fata bani'odi. ¹³ ✧ I na 'ivaisemi 'wa na vetoketoke bega tutuyanina 'ada

Toveimea Iesu i na vila-vaitugani yana tomotoga matatabudi taiadi, yami sauluva 'atumai'avadi wata magemagetadi 'wa na tovoi yada Yaubada Tamada mataneyeye.

4

Sauluvanina Yaubada yana 'eba sosoana, kumanina nuanuana.

¹⁻² Emavo, sai'afoga 'a na 'ailove, siwe nuanuama wata 'a na vonemi. Sauluva tonovidi 'wa 'asetadi 'waidiega 'ana fata Yaubada 'wa na kiavesosoani fai 'a ve 'waimie Iesu Keliso yana veimea 'wainega. 'Akonadi bani'odi 'wa vevesauluvedi, siwe 'asiau 'ada Toveimea Iesu 'ana wagavayega wata 'a na vonemi, nuanuama bwaikina 'wa na nunuave'avini Yaubada yana nuanua 'wa na 'ilidewai. ³⁻⁴ ✧ Side bani'odi Yaubada nuanuana 'wa na vevesauluva. Nuanuana yami sauluva magemagetadi mataneyeye, kebu 'wa na sakona bunu 'ana nuanua 'wainega, 'wa na nagiga yami vevinevo 'wa na veve'ililibuyedi wata yami sauluva tonovidi Yaubada mataneyeye. ⁵ ✧ Kebu nuanuama tomotoganidi Yaubada kebu i da 'asetaigna yadi sauluva 'wa na vetutuyamedi, i veve'avula-avo'avovo. ⁶ Kebu i da lubwaineni tamu aitoi iana i na vekalieni yana vavine i na luobuyedi, fai egavo bani'odi i sakonaga 'Aueva vematavuloga i na veledi. Naninina faifaina basenadi 'a matakiami. ⁷⁻⁸ ✧ Yaubada i venua'ivineda kebu ta na sakosakona, i venua'ivinedaga ta na vevesauluva tonovina mataneyeye, bega

✧ **4:3-4:** 1 Fit 1:16; 1 Kol 6:13,15 ✧ **4:5:** Lom 1:24-28 ✧ **4:7-8:** 1 Fit 1:15; Luk 10:16

egavo yama venidi i na vedumwe'ai'aiediga, kebu tomotoga yama veimea 'aisedi i da vedumwe'ai'aiedi, siwe wata Yaubada, taunina 'Anu'anununa 'Atumaina 'ana to'anivelena 'waimie, i vedumwe'ai'aieni.

⁹ ✧ Omi tovetumagana ma emiavo 'wa vevenuakalikaliga, kebu i da lubwaineku faifaina 'a na kiluma 'waimie. Kebu i da lubwainekuga fai 'akonadi Yaubada i vemi bani'odi 'wa na munega ma emiavo 'wa na vevenuakalikaliga. ¹⁰ Vona mogitana 'akonadi bani'odi 'wa vevesauluvedi emiavo tovetumaganavo yami 'awalawa Masidonia matatabuna nageneye 'wa nunuakalikaliedi. 'Wa nunuakalikaliga siwe 'a na velu'ase'asemi nuanuama yami nuakalikaliga i na vebwaika-'afo'afo.

¹¹ ✧ Nuanuama 'wa na vewavawava yami mia bikana, kebu 'wa na tolive'eda tomotoga 'ifwaidi 'waidie, we'e 'ami'ami faifaina taunimi 'wa na folofolova, basenadi bani'odi 'a vonemi. ¹² ✧ Ai'edi bani'odi 'wa na vesauluvediga, egavo kebu i da tauyediga Iesu 'waineye yami sauluva i na 'isedi i na ve'ililibuyemi wata kebu vakeli'ava 'waineye 'wa na nuanua.

Iesu yana vila-vaitugana faifaina.

¹³ ✧ Emavo, nuanuama 'a na veifufu 'waimie towafa faifaiddi bega kebu 'wa na nuavita. Egavo kebu i da vetumaganaga Keliso 'waineye i nunuavita ediavo i wafaga faifaiddi fai i nuani kebu wata i na 'isedi, we'e 'ida tovetumagana kebu bani'odi ta na munega. ¹⁴ Ida ta vetumaganata 'asetai Iesu i wafa wata i yawasa-vaitugana,

✧ 4:9: Ion 13:34 ✧ 4:11: Efe 4:28 ✧ 4:12: Kolos 4:5 ✧ 4:13: 1 Kol 15:20; Efe 2:12

begaidi wata ta vetumagana Iesu yana tomotoga i wafaga i na yawasa-vaitugana bega Iesu taiadi Yaubada i na vagavaidi i na maia.

15 ✧De'e 'ada Toveimea Iesu yana vona 'a lulu'ivoneyeni 'waimie. Tutuyanina i na vilai i na mai 'ida ma yawaida kebu ta na kumetaga, nagami tovetumagana wafawafadi i na kumeta Iesu taiadi i na veluaga. 16-17 We'e 'aiatanina 'waineye bona bwaikina 'wainega i na veimea, anelose yadi to'edakumeta bonana wata Yaubada yana evulega tomotoga i na nogaidi, nika 'ada Toveimea taunina i na obuma abamega. Keliso 'ana tovetumaganavo i wafaga nagami i na tovoi, mulieta 'ida ma yawaida ta na miamianiga i na si'augida ma fuedeye ta na laka waowa 'waidie Toveimea Iesu taiadi ta na veluaga 'awasasa'aveye. Bega tutuya matatabuna 'ada Toveimea taiadi ta na mia-vagata. 18 Vona mogitana ta na tovoi wafayega begaidi wafa 'ana tutuye emiavo 'wa na kiavesosoanidi vona de'e 'wainega.

5

'Wa na 'idewadewa 'ada Toveimea yana vila-vaitugana faifaina.

1-2 ✧Emavo, kebu i da lubwainema Iesu yana vila-vaitugana 'ana tutuya faifaina 'a na kiluma 'waimie fai 'aiatanina 'akonadi 'wa 'asetai i na vaimwaimwamo. 'Ai'edi tamu tovainago nuana i na vainago lovane kebu i na lu'ivona, i na maimo. Wata bani'odi 'ada Toveimea yana 'aiata

✧ 4:15: 1 Kol 15:51-52 ✧ 5:1-2: Mad 24:36; Mad 24:42-44

kebu i na lu'ivona i na maimo tomotoga yawaidi i na lovoga. ³ ✧ 'Ai'edi vavine ma kamodi, kebu i da 'asetai ma'avia i na vebutudi, i na miamiamo nika i na vebutudi. Wata bani'odi kebu ta da 'asetai ma'avia Iesu i na souyeni. Tutuyanina tomotoga i na vo, Yada mia i ve'atumai, vetalaga kebu,” bei i na tala'avuidi nika yawaidi i na lovoga. Kebu tamu aitoi 'ana fata i na dega 'alo ava'aiamo i na nago.

⁴ Emavo, we'e 'omi kebu dudubala 'ana tomia, bega kebu i da lubwainemi 'ada Toveimea i na veyawailovogimi yana 'aiata 'waineye. ⁵ ✧ Omi matatabumi mageta 'ana tomia wata 'aiata 'ana tomia. 'Ida kebu lovana 'ana tomia, kebu nuanuada dudubala 'ana sauluva. ⁶ Begaidi kebu i da lubwaineda ta na 'eno'eno tomotoga 'ifwaidi bani'odi, ta na 'isa'isa wata yada sauluva ta na 'i'isave'avinidi. ⁷ We'e lovana tomotoga yadi 'eba 'eno, wata lovane tomotoga ufa toketokedi i yemuyemu nuadi i lulugaugaudi. ⁸ ✧ 'Ida 'aiata 'ana tomia i lubwaineda yada sauluva ta na 'i'isave'avinidi, ma yada nuakalikali Yaubada ta na vevetumaganeni, wata ta na nuani mogitana 'ita'ita'i ta na veluagai Iesu 'wainega. Bani'odi ta na vevesauluvediga taunida ta na 'ibababaleda Seitani 'wainega. ⁹⁻¹⁰ ✧ Yaubada i venua'ivinedaga kebu yana vematavuloga faifaina, i venua'ivineda nuanuana i na 'ita'ita'ieda 'ada Toveimea Iesu Keliso 'wainega, taunina i wafa faifaيدا bega ta-iaidi ta na miamia. 'Ai'edi ma yawaida 'alo ta na wafaga kebu tamu ava'ai, tutuyanina i na vilai

✧ 5:3: Luk 21:34-36 ✧ 5:5: Efe 5:8-9 ✧ 5:8: Efe 6:14,17

✧ 5:9-10: Lom 14:7-9

i na mai 'waineye ta na nagoi. ¹¹ ✧'Akonadi ma emiavo 'wa ve'ivaivaita yami vona 'waidiega i lubwainemi tutuya fue di bani'odi 'wa na mune-munega fai ta 'asetai 'awaie Iesu taiadi ta na mi-
amia.

Faulo yana nuanua 'ana 'eba ve'a'ava.

¹² ✧Emavo, nuanuama bwaikina 'ami to'edakumetavo 'wa na veve'ililibuyedi, taunidi 'ada Toveimea Iesu i venua'ivinedi yana folova i 'i'idewadi 'awasasamie, i 'i'isave'avinimi wata i veve 'waimie Keliso yana nuanua faifaidi. ¹³ Yadi folovanidi faifaidi ma yami nuakalikali 'wa na ve'ililibuyedi bwaikina. Ma emiavo yami mia i na ve'atumai kebu taiadi 'wa na ve'ikwayekwayega.

¹⁴ ✧Emavo, 'a na velu'ase'ase mi, nuanuama tovedumwe'ai'ai 'wa na matakiadi i na folofolova, tovenuafouviga 'wa na tolinuavatuvatudi, egavo i mwea 'wa na 'i'ivaisedi, wata 'wa na totokemaiga 'wa na vetofolova tomotoga matatabudi 'waidie. ¹⁵ ✧'Wa na 'i'isave'avinimi bega 'ai'edi egavo i na vesauluva sakoina 'waimie, kebu tamu aitoi 'waimiega wata sakona 'wainega i na tutuli, siwe tutuya fue di 'wa na vewavawava ma emiavo wata tomotoga 'ifwaidi 'waidie 'wa na vevesauluva 'atumaina.

¹⁶⁻¹⁸ ✧'Omi Iesu Keliso yana tomotoga, side bani'odi Yaubada nuanuana 'wa na vevesauluvedi. Tutuya matatabuna ma yami sosoana, 'wa na vevelu'ui-vebogi, wata 'ai'edi

✧ **5:11:** Iud 1:20-21 ✧ **5:12:** Ibu 13:17 ✧ **5:14:** 2 Tes 3:6,11,15

✧ **5:15:** 1 Fit 3:9 ✧ **5:16-18:** Fil 4:4; Luk 18:1; Efe 5:20

tutuya safailina 'alo tutuya vitana 'waimie, siwe 'wa na vevekaiwamo Yaubada 'waineye.

19-20 ✧'Anu'anunu 'Atumaina yana folova wata yana 'aivaita kebu 'wa na ve'etobodeni, wata 'ai'edi aitoi 'Anu'anununina yana toketokena 'wainega i na lau'agega, kebu 'wa na sidibidibieni. 21-22 ✧Venidi wata nani matatabuna nagami 'wa na venua'ivinedi, 'ai'edi mogitana 'atumaina 'wa na 'ive'avini, we'e nani 'aitamogana 'aitamogana sakoidi 'wa na kekesedi.

Faulo yana 'alanuai.

23 Yaubada nuanua bikana wata mia 'atumaina i veleveleda, bega a vevelu'ui nuanuaku Yaubadanina i na 'ivaisemi yami sauluva 'atumai'avana mataneyeye. Wata nuanuaku 'anu'anunumi, yami nuanua, wata tomogomi i na 'i'isave'avinidi i na nagoga 'ada Toveimea Iesu Keliso yana vila-vaitugana 'waineye kebu tamu 'ami 'eba awavesako. 24 ✧Yaubada i venua'ivinemiga, taunina naninidi de'e i na 'idewadi faifaimi fai ma 'ana vetumagana, kebu i na baileda.

25 Emavo, nuanuama faifaima 'wa na vevelu'ui.

26 Tutuyanina emiavo tovetumagana 'wa na veluagadi, ma yami sosoana matatabudi 'wa na 'avalamaigidi, yami nuakalikali 'ana 'eba 'isa.

27 'Auvea yana veimea 'wainega a velu'ase'ase mi bega leta de'e 'wa na lu'iaawawai edavo tovetumagana matatabudi matadie.

28 'A vevelu'ui faifaimi, nuanuaku 'ada
Toveimea Iesu Keliso ma yana nuakalikali i na
vevesauluva 'atumaina 'waimie.
'Asa'aiana bani'odi,
Yau Faulo.

YAUBADA YANA VONA'AWAUFUFA 'IVAUNA
The New Testament in the Iamalele Language of Papua
New Guinea

Nupela Testamen long tokples Iamalele long Niugini

copyright © 1984, 1988 Wycliffe Bible Translators, Inc.

Language: Iamalele

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

PDF generated using Haiola and XeLaTeX on 11 Nov 2022 from source files dated 9 Oct 2020

db771331-f438-5051-a7d5-80ea6197c078